

Tewaskan sembilan pasukan lain

# UTHM, UPSI juara Sofbol IPT 2014

Oleh SAFINA RAMLI  
dan SHARUM SAMSUDIN

lmsa@kefahy@utms.com.my

## ■ KUBANG PASU 2 DIS.

**P**ASUKAN sofbol Universiti Tun Hussein Onn Malaysia (UTHM) muncul juara bagi kategori wanita setelah mengalahkan pasukan Universiti Utara Malaysia (UUM) dalam Kejohanan Liga Sofbol Institut Pengajian Tinggi (IPT) 2014 yang berlangsung di padang Politeknik Sultan Abdul Halim Mu'adzam Shah (Polimas) di sini baru-baru ini.

Bagi kategori lelaki pula, pasukan sofbol Universiti Pendidikan Sultan Idris (UPSI) di nobatkan sebagai juara setelah mengalahkan pasukan UTHM dengan kutipan mata 9-4.

Pasukan pemenang bagi kejohanan tersebut menerima hadiah piala iringan dan medal yang disampaikan oleh Pengarah Kanan

Akademik Jabatan Pengajian Politeknik, Mohd. Ghaus Ab. Kadir.

Mohd Ghaus berkata, sebanyak 10 pasukan daripada IPT dari seluruh negara seperti pasukan daripada UUM, POLIMAS dan lain-lain menyertai kejohanan yang berlangsung selama lima hari bermula 25 November lalu.

"Kejohanan yang berlangsung ini bertujuan menyemarakkan lagi sukan sofbol di kalangan penuntut IPT tempatan.

"Ini selaras dengan pemilihan Polimas yang menjadi tempat pembangunan sukan sofbol dan pihak kami berharap dengan kejohanan sebegini sukan sofbol akan terus diminati ramai," katanya ketika ditemui di padang Polimas di sini baru-baru ini.

Dalam pada itu, jurulatih pasukan UTHM bagi kategori wanita, Mesafizam Mesri berkata, kemenangan yang diperolehi oleh pasukan wanita UTHM itu berkat semangat ahli pasukan yang gigih

berusaha.

"Ini merupakan kejuaraan sulung pasukan wanita UTHM bagi tahun ini dan kami sangat gembira dengan kejayaan ini tambahan pula kami telah mengalahkan pasukan UUM yang memang dikenali sebagai pasukan yang hebat.

"Kami hanya sasar untuk mendapat tempat ketiga dalam kejohanan ini dan kemenangan kami merupakan bonus kepada semua pemain," jelasnya.

Tambahnya, pasukan sofbol wanita UTHM baharu sahaja ditubuhkan kira-kira empat tahun lalu dan kini berada pada kedudukan keempat di dalam Majlis Sukan Universiti Malaysia (Masum).

"Kami sasarkan untuk tahun depan kami boleh menduduki tempat ketiga dalam Masum dan ahli-ahli pasukan sofbol UTHM akan terpilih menjadi pemain kebangsaan untuk peringkat antarabangsa pada masa depan," jelasnya.



PASUKAN UPSI muncul Juara lelaki Kejohanan Liga Sofbol IPT 2014 di Polimas, Kubang Pasu, Kedah, baru-baru ini.